



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**30. Kalenderwoche – ab 25. Juli 2010**

## Sennjohrn im Vormarsch

Gemnidz is das Zendrum dor Sennjohrn! Dor Weldmiddlung, kennde mor villeischd sogahr saachn! Ja, nirschendwo duds mähr Sennjohrn gähm... brozenduahl!... als wie in Gemnidz. Also, genauor gesachd - Sennjohrn un Senjoridas zusammgenomm!

Odor heeßn de weiblischn Sennjohrn Senjohras? Egahl - jednfalls hamm mir in Gemnidz 37,5 %, die iebor finfuneschzisch sinn! London had dageeschn bloß 14,7%. Noch e baar Jahre hin, dann ham mir als Silborzwiebln in Gemnidz de absoluhde Mährheid! Dann is Schluss mid luschisch! Dann herrschd Ruhe, Ordnung un Friedn! Fasd schon wie offm Friedhof.

Kenn Sie sich vorschdeln, was da dageeschn in London immor los sein muss... die Unruhe un Hegdigg, die die vieln jung Leide vorbreidn dun! Alleene so Schdudendn un annre Raudis! Off de Schdraßn, im Bark, in Dheador un Ginos... ieborall das junge Gemiese - erlähbnishungrisch, laud un offmöbslisch!

Bei uns in Gemnidz dud mor de Schdudendn zum Gligg gahr nisch mäggn. Die solln zwahr jedzde e bißl ins Zendrum geloggd wern, abor isch gloobe, das dud nischd wern. Die baar Schdudendn ham geeschn uns keene Schangsn! Un wozu denne ooch?

De jung Leide dun ja ihr Geld so leischdsinnisch ausgähm... ooch in Gasdschädädn un Resdaurangs! Die schbarn nisch so emsich wie unsoreens! Die dun ausgähm - vorjuggsn - gonsummieren! Die kenn nisch reich wern! Nee, reich wirsde erschd, wensde Sennjohr bisd,

odor Sennjohra, un dei Geld off de hohe Gande leeschn dusd. Un wenn de dann im Himml bisd, dann kannsde mid Schdolz dei Gondo ieborwachn. Bisses de Enkls durchgebrachd ham.

Nascha, de jung Leide...! Mir dun dursch de Einkoofszendorsch wandorn un frein uns, dass es scheen warm is. Koofn? Nee, koofn dun mir nischd mähr. Mir ham doch alles!

Mir sinn zufriedn... - ooch mid dor Bolledig! Mir wähl'n seid von dor Wende an Helmud Gohl. Un ooch wenn dähr jedzde gahr nisch mähr midmachn dud... mir wähl'n dähn schdellvordrähnd.

Nee, bloß keene Vorändorung! Un solange de Rende schdabil is... un das isse ja! - solange is alles im grien Bereisch! Wobei - was heeßd "grienor" Bereisch? Nee, so mid grien solln se uns ma liebor vom Halse bleim. Die baar Jahre, die mir noch off dor Ährde rumdaddorn dun, die baar Jahre dud de Ährde schon noch durchhaldn! Das bißl Glimaerwärmung... - nee, bloß keene Hegdig!

Allordings - de Schdadt muss nadiehrlich noch e bißl sennjohrnfreundlicher wern!  
Barrjährefreiheid un so! Un das e bißl bledzlich! Mir ham das saachn! Mir sinn de greeße Wählormachd!

Das eenzsche, was mir an dähr Endwigglung nisch gefalln dud, das is eischendlich, dasses, wenns immor wenischer junge Leide gähm dud, ooch immor wenischer junge Fraun gibbd. Un so reen fiehrs Ooche is das schade!

**Eduard Sachsenmeyer**